sia ruinato dil mondo; poi in campagna di trivisana fece una caxa belissima, la qual per i nimici è stà brusata, et è debitor per mezi fiti ducati 20 Cazude, Monte vechio ducati 321, Monte novissimo ducati 358, a le Raxon nuove per dazio di vin zercha ducati 455.

131) A dì 16. La matina, fo Colegio e leto le letere di Franza et di Milan, venute eri sera, et ordenato far ozi Pregadi et Consejo di X per aprir tutto quello hanno in ditto Consejo, et esser sopra mandar sier Andrea Gritti procurator a Milan, rechiesto da monsignor di Lutrech, etiam dal Cristianissimo re di Franza per le letere di . . . . come dirò di sotto; tamen sier Antonio Grimani procurator savio dil Consejo non sente. Et se dovea tratar questa materia proposta al Pregadi a di 14 di questo e d'acordo indusiato a Luni, ma hora voleno expedir ozi, e il Colegio sente di mandarlo.

Fo incantato in Rialto, per la Signoria, le galie di Baruto et di Alexandria, et trovono gran incanto, zoè la prima galia di Baruto ave sier Francesco Zen qu. sier Alvise qu. sier Francesco per ducati 1050; la seconda sier Anzolo Michiel, fo di sier Hironimo, per ducati 1491. *Item*, di Alexandria, la prima sier Vetor di Garzoni qu. sier Marin procurator per ducati 1011, et la seconda sier Bertuzi Contarini qu. sier Andrea per ducati 500; sichè Domenega si elezerano in Gran Consejo li capitani.

Da poi disnar fo Pregadi, et lo Marin Sanudo, licet avesse mal assae per la mia galta, et non esser stato zà tre Pregadi, mi parse non lassar questo importantissimo e andai.

Et venuto el Principe, si reduse in cheba con la Signoria, Consejo di X, la Zonta, il Colegio, et li Procuratori et Avogadori, et steteno un pezo. In questo mezo li Cai di XL andono a sentar, et fo lete alcune letere, qual fo queste:

Di sier Agustin da Mulla provedador di l'armada, date in galìa apresso Sibinico, a dì 4 di l'instante. Scrive come da Zara, di primo, avisoe le cose di Sibinico esser pacifice; et cussì per questo, zonto de lì, ha visto esser cussì vero e non se dubita più di turchi, nè è vero di alcuna adunation fazino; tamen per questo non se dia restar di mandar li 200 cavali presi mandar a quella custodia; nè si dubita più di Scardona per esservi intrato el vice ban dentro con cavali 260 et pedoni 600, el qual andoe sul territorio turchesco a li dì passati, ma niun danno potè far. Sono mosche che voleno

becar elefanti, ma è un provocar l'inimico. Ma questi subditi di la Maestà di Hongaria convieneno far queste robarie a li confini si dieno viver, perchè non sono pagati; e si ricorda dil 1517 esser stato in Scardona, la qual fin sarà dil Re preditto, sempre si dubiterà. Avisa, in questa matina sier Andrea Balastro novo conte di Sibinico è zonto con li fanti 13° 100 etc. Scrive, interzata sia la galia Contarina, si partirà; et ozi lui Provedador ha posto banco per trovar homeni, non ha trovato alcun, e cussi fece a Zara per esser deserta quella Dalmatia. A dì 3, la galia Dolfina zonse a Zara. E scrive come, per quelli de la galia Basadona è stà levà una zanza, che la Signoria non observa la promessa, e donde li hanno tolto el terzo che se li dà solum lire 6 al mese a li galioti, dicono etiam queste non vien pagate. Scrive. la galia Faliera è li, li avanza paga de mexi 3 ha voluto sovenzion da lui, e tamen ha portato con si solum ducati 3000; sichè bisogna si fazi provision.

Dil dito, di 6, ivi. Aricorda, mandando cavali, bisogna che stagino con li stratioti è de li nel teritorio e non in la terra, perchè turchi vieneno a corer, e stando in la terra, avanti li cavali ensano fuora, turchi è andati via con la preda.

Di Franza, dil Badoer orator nostro, date a Celes, a dì 4 Marzo. Come, a dì 27 fo le ultime et ozi è stato a Remoratino a la corte, dove è pochi personazi, benchè comenzano a venir, e monsignor l'Armirajo e monsignor Satiglion, et ozi è zonto monsignor di San Polo fradelo di monsignor Vandomo, et si aspeta el Contestabele, ch'è il ducha di Barbon, el qual starà poco, va a Molines al suo stato, è stato fino mò a Chiatelroy. Scrive coloquii auti col Gran canzelier zercha queste motion di fanti etc. Soa signoria li disse sono fanti spagnoli 4000, italiani 2000 et cavali 800; e che horamai dia esser aperto a tutti la causa di tal adunation. Poi parloe zerca novi capitoli etc.; et che al re Christianissimo convien ajutar el Papa per capitoli hanno insieme. Scrive, l'orator di la Cesarea Maestà è stato qui a la corte, qual fin hora era stà indisposto per una reuma venutoli in Ingaltera, sichè el volto se li infiò. Scrive poi altri coloquii auti con dito Gran canzelier, qual disse il Re ama la Signoria nostra e fa molto stima di lei, e che mai non l'abandoneria etc.; et che venendo pacifice in Italia, vegneria a Veniexia per dimonstrar a tutti la confidentia l'ha con questa Signoria. Scrive, il Re ha posto le poste verso Navara. che va a Bajona, ch'è signal di motion di guerra a quelli confini per il re di Navara, con li danari di l'avo paterno monsignor di Libret. Scrive, è zonto